

Paur kute Korxikam me jamã pi'ôk no'ôk ne ja.

Me'ô nhidjibê Epapraj ne arÿm Paurkôt Jejuo aminhõ. Ne kam akubyn ô pykabê Korximã tẽn kam memã ar Jeju'ã ujarênh ba. Nhym mekam kwÿ arÿm tu amim Jeju markumrêx ne kôt aben pydji. Nhym kam Epapraj Paur'ÿr tẽn bõx. Mekbê ijê djâkam Paur ãm rã'ã nhym Epapraj 'ÿr bõx ne kam ô pykabê Korxikam ar ja Paurmã ar arênhõ nhÿ. Nhym kam tu Paur kute ar omünh kêt kam tu kum ar kïnhkumrêx. Kute ar omünhmãn prãbê tu kum ar kïnhkumrêx ne kam arkum pi'ôk no'ôk ne. Nhym bep Korxikam me kwÿ ne me Metïndjwÿnh kabên kupa'ã ar memã arênhõ ba. Nãm me 'êx ne we,

—Me mykã rênhbít ne Metïndjwÿnh kum me kïnh ne meo kra. Ne ajte memã 'êx ne we,

—Metïndjwÿnh kadjy mrãnh djwÿnhmã akabên. Djãm abênjadjwÿr got ga katàt Metïndjwÿnhmã amijarê? Dja ga kadjy mrãnh djwÿnh kumrêxmã amijarê gê amũ kum ajarê, ane. Kati, nãm me memã 'êx. Nhym me kute mÿjja krênãm nhym me mebê mÿjja pyman memã kum,

—Ê, kwãrik wãnh ja krên kêt, ane.

Kam ne Paur arkum,

—Kwãrik wãnh atemã me kabênwã mar kêt. Nhym bep Kritu ne kabên mexkumrêx. Tãm gêdja gar 'ãno djan kabên ma. Kritu ajbit kute me utår. Kwãrik wãnh kadjy mrãnh djwÿnhmã akabênwã wãm nõ. Kritu pydji ne kute me utår. Kwãrik wãnh atemã 'ô jabej kêt. Ajbit ne Metïndjwÿnh djwÿnhĩ ne mÿjja kunĩ 'y ne kute me utår. Nã, nhym Jeju Bãmbê Metïndjwÿnh tãm ne amiwÿr me bajo bõx. Kra kukwakam amiwÿr me bajo bõx ne me bajo ôbikwakumrêx. Nãm ã Paur arkum pi'ôk no'ôko anen kam arkum ano. Tãm ne ja.

1 ¹⁻² Ba ibê Paurmê gwaj bakamy Ximoximê ne bar ar amã pi'ôk no'ôk ne. Ibê Paur, Metïndjwÿnh kute ijã amim karõ nhym Jeju Kritu kute ijanor ba itêm, ba, ba ne ba ar amã pi'ôk no'ôk ne. Krïraxbê Korxikam Kritu nhõ me ja, ô me mextire ja, ar aje amim Kritu markumrêx ne 'ã angrà tÿx ne Kritukôt aje abeno akamyja, ar amã ne ba pi'ôk no'ôk ne.

Gê Metïndjwÿnh ar ajo djuw mex, Metïndjwÿnhbê me Babãmmê krabê Bênjadjwÿr Jeju Kritu ar ukaprikôt ar ajo djuw mex ne ar ar ajo ba, ne ar amã umar mex jarê gar adjumar mex ne ar aba.

Paur kute Metïndjwÿnhmã arkam amikïnh jarênh.

³ Bar ije Metïndjwÿnhmã ar ajo idjà'wÿrkôt mã kum ar akam amikïnh jarê. Bãmbê Metïndjwÿnh, gwaj banhõ Bênjadjwÿr Jeju Kritu Bãmbê Metïndjwÿnh

kumã ne bar amikĩnh jarẽ. ⁴Mỳkam ne bar kum ar akam ikĩnh jarẽ? Bir, nã gãm ar tu amim Kritu Jeju markumrẽx ne kam kôt amã me jadjwỳ jabêkumrẽx, amã õ me ja, õ me mextire ja jabêkumrẽx bar arỳm kuman kam ikĩnhkumrẽx.

⁵Be, kute ar amã mỳjja mex djir ne gar kam ama. Metĩndjwỳnh kute kàjkwakam ar amã mỳjja mex djir ne katàt ar amã arẽnh, mỳjja mex tãm ne gar aman tu amim kamnhĩxkumrẽx ne kam kam ama. Ar aje mỳjja mexkam amakkam ne gar tu amim Jeju markumrẽx ne kam kôt amã õ me ja jabêkumrẽx. Bir be, nã gãm ar Jeju'ã ujarẽnh nyja man tu amim kamnhĩxkumrẽx. Jeju'ã ujarẽnhja ne katàt nõ. Kabẽn punu kêt. Kabẽn 'êxnĩ kêt. Kam ne katàt nõ.

⁶⁻⁷Be, Jeju'ã ujarẽnh ny arỳm wãkam ar awỳr bõxwã pumũ. Nãm me pyka kunikôt Jeju'ã ujarẽnhõ ajmã. Arỳm ne me o ajmã nhym me ar akudjwa arỳm kuman arỳm kum mỳjja mexbit kĩnh ne ar o ba. Nãm me mỳjja mexbit ma. Be, nãm ã wãkamdjwỳ ar amã arẽnhõ ane. Gar arỳm ã mỳjja mexbit maro ane. Krax kurũm ar aje mar totokbê ne gar ã amijo ane.

Epapraj ne ar amã Metĩndjwỳnh jarẽnhõ tẽ gar arỳm kôt maro tẽ. Nã, Epapraj ne ar amã Metĩndjwỳnh djukapřĩ jarẽ. Metĩndjwỳnh ne ukapřĩkôt ar ajo djuw mex. Nhym Epapraj ar amã ukapřĩ jarẽ gar kam arỳm tu amim markumrẽx. Nã gãm ar anhõkre kadjwỳnhbê,

—Nã, mrãmri ne arỳm Metĩndjwỳnh djukapřĩkumrẽx ne ja, ane. Nã, Epapraj ne ar amã arẽ gar maro tẽ. Ar imã Epapraj kĩ:nhkumrẽx. Nãm ar ikôt àpẽn ar ba. Mrãmri Kritu nhõ àpẽnkhkumrẽx ne kum àpẽn ar ba ne kute kanga kêtumrẽx. Nãm wãm ar akam bõx ne ar ikõpdjĩ'ã ar àpẽn ba.

⁸Be, Epapraj, ta ne ar imã ar amex jarẽn ar imã,

—Ota arkum aben jabêkumrẽx. Metĩndjwỳnh Karõ ne abenã arkum karõ nhym ar arỳm kum aben jabêkumrẽx, ane. Nãm ã ar imã ar ajarẽnhõ ane.

⁹Bir be, kam ne bar mã kum ar ajo a'uw. Epapraj kute ar ajarẽnh bar ije mar totokbê ne bar Metĩndjwỳnhmã ar ajo idjà'wỳr ry typydji. Nã bãm ar kum ar ajã,

—Dja ga prĩne arkum 'la karõ gẽ ar kuman akabẽnkôt ar amijo ba. Dja ga Akarõo prĩne ar no bõ, Akarõo ar no bõ gẽ ar prĩne akukràdjã ma. Nã bãm ar ã kum ar ajo idjà'wỳro ane.

¹⁰Bir be, dja Metĩndjwỳnh prĩne ar amã ar adjàpẽn'la karõn ar ano bõn ar amã amikukràdjã jarẽ gar kam arỳm mã kôt amijo aba mextire gẽ Bẽnjadjwỳr ar akam kĩnhkumrẽx. Ga kam ar amã mỳjja mexbit kĩnh ne ar o aban ajte Metĩndjwỳnh maro tẽ:n amũ maro ajkamẽn mar rax ne.

¹¹Gêdja Metĩndjwỳnh prĩne ar ajo tỳx. Djãm uma ngri got. Uma raxo kute mỳjja kunĩ jakrenh. Ta tỳxo godja prĩne ar ajo tỳx ne, ta mexo prĩne ar ajo mex ne. Ga kam ar akrànmã amijo aba. Kwãrĩk wãnh gẽ te mỳjja punu ar akam apõx nàr kon ar akapřĩ ar akam apõx gar mã Jejukôt ajkamẽn tu akrànmã amijo aban angryk kêt ne tu akĩnhkumrẽx. ¹²Ne tu Jeju Bãmbê Metĩndjwỳnhmã amikĩnh jarẽ.

Bir, mỳkam? Bir, arỳm ne gwaj bajo mex. Gwaj bamex nhym kute õ me mextire jamẽ ro'ã gwaj bamã mỳjja nhõrmã. Kute õ me jamã mỳjja mextire

djir ja tām gêdja gwaj baro'ã gwaj bamã kungrã. Õ pykakam a'ubit, õ pykakam me axwe 'õ kêt, mỳjja punu 'õ kêt tām'ỳr dja gwaj bôx nhym kute gwaj bamã mỳjja ngranh ne kam ar kute gwaj bajo bamã. Kadjy ne gwaj bajo mex ne.

¹³Be, arỳm ne mrãmri tu gwaj bapytarkumrêx. Amrêbê ne Xatanaj ar gwaj bajo ba gwaj kam bamã bajaxwebit kinh ne ar o baba nhym kam kute mrãmri akamât kô tykkam kute ar gwaj bajo ba pyrãk. Nhym arỳm Metĩndjwỳnh kubê gwaj bapytà nhym arỳm wanh ar ba. Arỳm tu Xatanajbê gwaj bapytarkumrêx. Xatanaj kute àtykri ar gwaj bajo bajabê ne arỳm gwaj bapytà nhym Kra arỳm ar gwaj bajo ba. Bãm kum Kra kĩnhkumrêx ja ta ne arỳm ar gwaj bajo ba.

¹⁴Nà, Bãm ta Xatanajbê gwaj bapa 'amỳ. Amrêbê Xatanaj ajbit ar gwaj bajo ba nhym kam Bãm kubê gwaj bapa 'amỳn gwaj bajo katon gwaj bajaxwe tu o aknon gwaj bajo ba. Kra tyk ne kamrô bikapĩnkôt ne Bãm gwaj bapytàn gwaj bajaxweo aknon tu mar kêt ne.

Kritu kute raxo katàt me kunĩ jakrenh.

Dju r 1.1; Kar 10.36; Kor 2.9; Idja 1.2

¹⁵Nà, kra ta ne memã Bãm amirĩt ne. Djãm me kute noo Metĩndjwỳnh pumũnh got. Me kute noo omũnh kêt. Nhym kam kra ta memã Bãmbe Metĩndjwỳnho amirĩt ne. Amê ar kute aben pyrãk. Ar amê tãmỳ. Nhym kam kra ta memã Bãm amirĩt ne. Ne kam ajte kubê Metĩndjwỳnh Krakam ta ne õ mỳjja kunĩ djwỳnh, mỳjja kunĩ nhõ bẽnjadjwỳr.

¹⁶Ta ne kute mỳjja kunĩ 'yr djwỳnh. Bãm kabẽnkôt ne mỳjja kunĩ 'y. Kàjkwamê pykakam mỳjja ja kunĩ 'y. Mỳjja me kute noo omũnhjamê mỳjja me kute noo omũnh kêtjamê, tãm ne kunĩ 'y. Me karõ nhõ bẽnjadjwỳrmê kadjy mrãnh djwỳnh nhõ bẽnjadjwỳrmê mebêngôkre^a nhõ bẽnjadjwỳr rũnhmê bẽnjadjwỳr krymê mỳjja kunĩ ne amim ipêx ne. Bãm kabẽnkôt amim ku'y. Nãm prĩne amim mỳjja kunĩ 'y, prĩne o atom, kam ne õ mỳjja kunĩ djwỳnh, ta õ mỳjja djwỳnh.

¹⁷Adjakam, mỳjja kator kêttri ne Jeju ar tĩn ne ba. Djãm pykabê mỳjja ta ar ba? Kati, ta ne kute mỳjjao ba djwỳnh ne kam kute mỳjja 'õ kanga kêtumrêx. Kute mỳjja kunĩ 'yrkam ne kute mỳjja 'õ kanga kêt. Kra ta ne ar mỳjjao ba. Nhym mrãmri mỳjja tu kunĩ rã'ã: rã'ã.

¹⁸Nhym ajte Krabê Jeju ta ne õ me ja kadjy bẽnjadjwỳr. Me kute amim Jeju mar ne kôt amijo baja me tãm ne me kute Jeju nhĩ pyrãk. Nhym bep Jeju ne kute krã pyrãk. Jeju ne kam õ me ja kadjy bẽnjadjwỳr. Ta ne kutewa ne kam amikôt mỳjja kunĩ apôxo tẽ. Ne kubê Metĩndjwỳnh krakam kumrêx me tyk kurũm tĩn ne kato. Kam ne ajbit pydji raxo kute mỳjja kunĩ jakrenh, raxo mỳjja kunĩmã wa.

¹⁹Kubê Metĩndjwỳnh djwỳnhĩ. Apỳnh Ar kubê Metĩndjwỳnh djwỳnhĩ. Kra kubê Metĩndjwỳnh djwỳnhkumrêx. Metĩndjwỳnh ne Kramê kute

^a 1.16 Apỳnh me õ pyka djari kunĩkôt ne me kunĩ bêngôkre. Kubêkà jakamê me kakrãtykmê me babêngôkremê ne me kunĩ: bêngôkre.

aben pyrāk'ā amim karō nhym kam Kradjwỳ kubê Metĩndjwỳnh djwỳnhĩ. Ar amê kubê Metĩndjwỳnh djwỳnhĩ.

²⁰Bir be, Metĩndjwỳnh ta ne amim Kra'ā karō, krakôt kute amim mỳjja kunĩ òbikwamā, pykakam mỳjja nār kàjkwakam mỳjja, kunĩ kute o òbikwamā. Mỳjkôt? Krakôt, kra ne me kadjy pĩte'ykam tyn kamrô ajkapĩ nhym kam kôt Bām memā kabēn mex jarē nhym me arỳm umar mexbit ma.

Metĩndjwỳnh kute meo òbikwā.

²¹Amrêbê ne gar Metĩndjwỳnho akurê djwỳnh. Ar aje ajaxwekôtbit ajamak bēn ne aje mỳjja jaxwebit ar o abakam ne gar o akurê djwỳnh. ²²Nhym bep ajbir ne Metĩndjwỳnh ar ajo òbikwa. Nā gām ar te amā kurê nhym Metĩndjwỳnh tu ar ajo òbikwakumrēx. Kra ne me kadjy amijo kubēngôkren ruwn kam ty. Nhym kam kôt Metĩndjwỳnh ar ajo òbikwakumrēx. Mỳj kadjy ne ar ajo òbikwa? Bir, kute amiwỳr ar ajo bôx, gar kabem aku'ēmā. Ar mrāmri Metĩndjwỳnh mexo amextire ne ajmā akute kêt ne ar aba ne ar akam mỳjja punu 'ô kêtumrēx ne kabem aku'ēmā. Kadjy ne Metĩndjwỳnh ar ajo òbikwa, godja gar arek o tēn kanga kêt jabej. ²³Godja gar arek aje Jeju 'ā angràn mrāmri adjām tỳx ne aje kanga kêt jabej ne kam ajte amijā kamnhĩxbê kam amak ar o aban kanga kêt jabej. Nā gām ar arỳm Jeju'ā ujarēnh nyja man kam amim kamnhĩx ne kam kam ama. Godja gar mrāmri arek kôt amijo atēm rā'ā ne aje kanga kêt jabej ne kam mrāmri arỳm 'yr bôx. Djām ar gajbit ne gar Jeju'ā ujarēnh ma? Kati, pyka kunikôt ne Jeju'ā ujarēnh mekôt ajmā. Ba ibê Paur ne ba memā Jeju kukrādja ny'ā idjujarēnh mō. Idjāpēnh ne ja. Kam ne ba kājibê memā 'ā idjujarēnh mō.

Paur me kadjy àpēnh.

²⁴Ā idjujarēnh mō nhym me arỳm kôt ijo ajkê ba itokry ne. Djām kôt ikapri? Arkati, ikĩnhkumrēx. Me akadjy ne ba itokry ne kam ikĩnh ne. Mete Krituo bikēnh nhym tokryja 'ā ne me ijakre. Ba kam ba itokrykôt mete inhĩo bikēnh ba, ba itokryjakôt ne ba Kritu tokry nhinomā rēnh o tē. Jeju nhĩ kadjy, mete amim Jeju mar ne kute Jeju nhĩ pyrākja, me kadjy ne ba itokryja. ²⁵Ne me akadjy idjāpēnhja. Metĩndjwỳnh ne me akadjy idjan imā idjāpēnh jarē. Ba kam me amā idjāpēnh ar iba. Mỳj idjāpēnh nā? Bir, ije me kunĩmā prĩne Metĩndjwỳnh kabēn'ā idjujarēnh itēm nhym me kunĩ kute marmā.

²⁶Amrêbê ne me kunibê Kritu apdju ne. Nām me bakukāmāre amikam kra jadjwỳro tēm tāmā: nhym bipdjur rā'ā. Nhym kam ajbir Metĩndjwỳnh arỳm memā o amirĩt, ta ô me mextire jamābit o amirĩt ne. Kute amim me ja'ā karōkôt ne memābit o amirĩt ne. ²⁷Amrêbê ne amim 'ā karō ne kam mebê udju: ne. Ne arỳm jakam memā o kato, ô me mextire jamābit ne o amirĩt ne. Mỳj ne mekbê udju ne ajbir memā o amirĩt ne? Bir, Kritu me bakadjwỳnhbê yrja. Tām ne gu me ô mỳjja mex'ā amim kamnhĩx ne. Kritu me bakadjwỳnhbê yrkam ne myt kunikôt mā me bamā mỳjja mex ngā ba me ikĩnhkumrēx. Mā ne mỳjja mexja kute? Bir, mỳjja mex ja ne apēx prām kêtumrēx. Mỳjja mex ja ne mexo kute mỳjja kunĩ jakrenh, kute

me kute ò nêkrêxo amimexja kunĩ jakrenh mex ne. Dja mã amirĩt rã'ã ne. Djãm me kwỹmã ne o amirĩt ne? Kati, pyka kunĩkôt ne ò me jamã o amirĩt ne.

²⁸Bir be, kam ne bar mã me kunĩmã Kritu'ã ajarẽ. Ar ikrã mexkôt, ar ikabên mexo ne bar me kunĩmã tĩn jangijn me kunĩmã Metĩndjwỹnh kabên jarẽ. Ar ije Metĩndjwỹnhmã meo imôr ne kum me òrmã. Me kunĩ arỹm kute Kritu mar mex ne kute inomã mênh, me tãm ne bar ije Metĩndjwỹnhmã meo imôr ne kum me òrmã. ²⁹Kadjy ne ba idjãpênhkam ityk djã kêt ne. Djãm Kritu rerek got. Axwe tỹx ne ta tỹxo ijo tỹ:x ba kam me kadjy idjãpênh ra:x ne.

Kritu ajbit rax nhym me kute ja mar kadjy ne Paur djãpênh raxja.

2 ¹Ë, ba ar amã arẽ, gar ama. Gora ar amã idjãpênh raxjakôt ima. Krĩraxbê Raodjikam ar jamẽ apỹnh krĩ rũnh djãri me jamẽ me aje te ipumũnh kêt ba akrãnmã ar me akunĩmã idjãpênh ibaja pumũ.

²Mỹj kadjy ne idjãpênh raxja? Ije ar amã tỹx jangjênh gar ajte atỹxmã. Ne ajte ar amã aben jabên axikôt akabên ne ar abamã. Ga kam ar aje mrãmri Kritu markumrêxmã, Metĩndjwỹnh kute prĩne mekbê o bipdjurja ar aje mar ne aje katàt kôt mar ar o abamã. Mỹj ne mekbê o apdju? Kritu. Kritu mekbê bipdjur ne gar aje marmã. Me kute Kritu mar rax ne kute mrãmri me ò nêkrêx rũnh pyrãk. Dja gar ã Kritu mar rũnho ane. Kadjy ne idjãpênh raxja.

³Nã, Kritu pydji ne kute amikadjy memã no mex jangjênh djwỹnh. Ajbit kute memã Bãmmê ar kukràdjão amirĩt, kukràdjã bipdjurjao amirĩt nhym kôt me arỹm ò mỹjja mex maro tẽ, ò mỹjja mex maro tẽn kam kôt no mex. Nhym kam apỹnh me kute Metĩndjwỹnh nhõ mỹjja mar djãri mrãmri kute ò nêkrêx mextire ja pyrãk. Be, ga Kritu pydji kute amikadjy memã no mex jangjênh nhym me no mex ne kute ò mỹjja marja pumũ. ⁴Atemã 'õ kêt. Ta pydji ne kute Bãmo amirĩt. Ë, me'õ kute ar anoo biknor karõ ne ba ar amã katàt 'ã ajarẽ. Me 'êx ne kute kabên punuo amikabên mex ne o kute ar anoo biknor karõ ne ba ar amã ane.

⁵Nãm te jãnh prãme ba amybymbit imã ar akĩnh ne ar amar rã'ã. Arỹm ne ba ar aman kam ikĩnhkumrêx ne. Nã gãmh ar amim Kritu markumrêx ne 'ã angrã tỹx ne amã me uma kêt ne kanga kêtumrêx ne 'ãno dja, ne akrãnmã aben mẽ ar aba. Ba kuman kam ikĩnhkumrêx ne.

Ar kute Kritubit mar kadjy.

⁶Bir be, ar aje Kritu Jejuo anhõ Bẽnjadjwỹrkam ã kôt amijo abao ane, anhõ Bẽnjadjwỹr Jejukôt ã amijo abao ane. ⁷Dja gar ã amũ Kritu maro abikamênho atêm kute mrãmri ne pĩ abatàn kadjy kute pykamã arẽ ngjênh ne kute pyka 'amỹnh tỹxja pyrãk. Dja gar ã amũ Kritu maro abikamênho atêmo ane, ne ã Kritu 'amỹnh tỹx ne 'ãno adjãmo ane. Ne amrêbê ar aje amim Kritu marja arek o tẽ. Me kute ar amã arênhkôt dja gar arek o anhỹro tẽ. Dja gar ã o anhỹro atêm rã'ãn prĩne mar tỹx ne. Ne kam Metĩndjwỹnhmã amikĩnh jarẽ, ne kum amikĩnh jarênh 'ãno dja.

⁸Dja gar aminêje me kabên punuwã pumũ. Dja me kabên punu 'êx ne amijo kabên mex ne môn ar anoo akno. Djãm me kabên punuja kabên katàt got, kabên mex got? Kati, me kabên kajgo mexi. Me ta ne me ar abenmã 'êx ban amũ abenmã arênho mör tãmtã nhym i kamingrãny amũ abenmã arênho mō. Djãm Metĩndjwýnh kabênkôt ne wã? Kati, me ta kukràdjàkôt ne me kabên kajgowã. Nhym bep atemã ne Kritu kabên katàtã. Mrãmri katàt arê.

⁹Kubê Metĩndjwýnh djwýnhkumrêx. Amijo kubêngôkren me bawýr pykamã ruw. Kubêngôkrekam ne kubê Metĩndjwýnhkumrêx. Am Metĩndjwýnh djwýnhĩ. Ta ne kubê Kritu. ¹⁰Ne ta gwaj bakadjwýnhbê nhýn gwaj bamã umar mexti:re jarê. Gwaj bamã umar mextire jarê gwaj kam bakĩnhkumrêx. Mã ne gwaj bakĩnh kute? Bir, mrãmri me kute ô nêkrêx rû:nhkam kĩnhja pyrãk. Dja gwaj Jejukam bakĩnh bamã nêkrêx kĩnhja jakrenh mex ne. Ê, mrãmri ne Kritu raxo kute me bẽnjadjwýr rũnhmê me bẽnjadjwýr kry kute meo baja kunĩ jakrenh. Ta ne umar mexo ar gwaj bajo ban gwaj bajo kĩnh ba, gwaj bamã kĩnh jangjêho ba.

¹¹Arým gwaj baje Krituo aminhókam ne gwaj atemã bakukràdjã. Gwaj bakukràdjã tũm, gwaj bajaxweja ne gwaj arým tu wãnh kangan kum banhire. Ne kam gwaj bamex kute mrãmri ne mekbê idjaer kute me my nhĩnhu kã rênh nhym me kam mex ne kĩnhja pyrãk. Me bajtem kute Metĩndjwýnh nhô me ja mar kadjy ne me me my nhĩnhu kã rê. Nãm me me my nhĩnhu kã rên mũm kurên kam kĩnh nhym Kritudjwý arým gwaj bamã gwaj bakukràdjã tũmja mũm ã rênho ane gwaj kam ã badjwý ã bamexo ane nhym Metĩndjwýnh arým gwaj bakam kĩnh ne.

¹²Jeju akubyn tĩn ne me tyk krã kurũm kator'ã ne ngônhmã gwaj bajangjênhja amijakre. Ngônhmã gwaj bajangjênh ne kute Jeju tyk ne pykakam ir pyrãk. Nãm me ã ngônhmã gwaj bajangjêho ane. Ngônhmã gwaj bakrã jangjênh, gwaj kam akubyn bakrã apôx ne kute Jeju kênkre kurũm akubyn tĩn ne kator pyrãk. Metĩndjwýnh ta ne tỳxo akubyn Krituo tĩn, me tyk kurũm Krituo kato. Gwaj kam arým tu amim kamnhĩxkumrêx nhym kam ngô kurũm me bakator kute gwaj badjwý akubyn batĩn pyrãk, kute ta tỳxo Kritumê ro'ã gwaj bajo tĩn pyrãk. Kam dja gwaj bakukràdjã nykôtbit amijo baba.

¹³Bir be, amrêbê ne gwaj baje batyk pyrãk ne ar baba. Nã gwaj bajaxwekumrêx ne mũm amikukràdjã tũm rênh kêtka kute me batyk pyrãk. Nhym bep ajbir ne Metĩndjwýnh gwaj bajaxwe kunĩo biknorkumrêx. Nhym kam kute Kritumê ro'ã gwaj bajo tĩn pyrãk.

¹⁴Arým ne Metĩndjwýnh Môjdjê kukràdjão apêx. Môjdjê kute memã “Kwãrĩk wãnh” anhyr ne 'ã pi'ók no'ókja arým o apêx. Nã gwaj te kukràdjàkôt amijo babamã ãm mã bajamakkre kêt. Nhym kam Metĩndjwýnh ôkre kadjwýnhbê, —Ikra tykkôt, mete pĩte'ykam kum o i'êk nhym tykkôt dja me tu amim ikamnhĩxkumrêx ba kam me'ã mex rê. Nãm me te Môjdjê kukràdjàkôt te o anen mar kêtumrêx ne, ane. Nãm ã Metĩndjwýnh o anen ã Môjdjê kukràdjão apêxo ane.

¹⁵Be, Kritu tykkôt ne Metĩndjwýnh me karô punu rũnhadjwýo ajkê, me karô punu nhô bẽnjadjwýrmê, me tãm ne Metĩndjwýnh meo ajkê. Nãm me

amipardja'ã me pa 'amÿn kam meo kurwÿko ban meo bôx. Me ipôkri ne meo kurwÿko ban meo bôx ne kam prÿne mekbê àbêr djà kunõ apdjun kam memã me uma ngranh mex ne. Nhym me kunÿ kôt omÿn arÿm kôt kuma. Nãm ã Kritu tykkôt ã Metÿndjwÿnh me karõ punu rÿnho bikênho ane.

¹⁶Metÿndjwÿnh kute me karõ punu rÿnho bikênham kwârÿk wãnh ô kukràdjà mar kêt. Nãm me Môjdjê kukràdjà kupa'ã mekbê mÿjja pyma ar o ba ne memã amijangri'ã apnê. Bir be, kukràdjà kakritja dja gar mar kêt. Metÿndjwÿnh arÿm kute mÿjja tÿmjao apêxkam dja gar mar kêt. Kwârÿk wãnh ga arÿk ar adjàkur abakam gê me'ô adjàkur mÿr jabej ar amã kabên 'ô jarênk kêt, nàr kon, mÿjjao akôm mÿr jabej gê me'ô ar amã kabên 'ô jarênk kêt. Nàr kon, me rer mex 'ôkam, mytyrwÿ 'ôkam, akati 'ôkam, me rer mexo môrkam, mekôt ar aje amijo anhÿr kêtka, kwârÿk wãnh gê me kam ar amã kabên 'ô jarênk kêt. Kwârÿk wãnh mÿjja kukràdjà ja mÿr jabej gê me'ô ar amã àkrê kêt.

¹⁷Kritu bôx kêttri ne me kukràdjà ja arÿk kam ar ba. Nãm me Kritu kutêp ar kukràdjà jabito ba. Kajmã'ã ari o ba nhym kam bôx ne arÿm o ajngrà, kukràdjà tÿmja tu mÿm kumê.

¹⁸Kwârÿk wãnh me 'êx ne kute amijo pijam ne arÿk Metÿndjwÿnh kadjy mrãnh djwÿnhmã kabênja wãnh nô. Nãm me kum mÿjja ja kÿnh ne 'ã ar amã apnê, ar aje me kudjwamã. Nãm we me,

—Dja gar me ikudjwa kadjy mrãnh djwÿnhmã amijarên kum rax jarê nhym arÿm Metÿndjwÿnh kum ar akÿnh. Dja ga ar o anhÿr kêt nhym arÿm kum ar akÿnh kêt. Djãm abênjadjwÿr got ga tu Metÿndjwÿnhmã akabên, ane. Kati, nãm me 'êx. Kwârÿk wãnh wãm nô gê me ja ar anoo biknor kêt.

Nãm we me biptirkam mÿjja pytiro ikwãn we ar amã kôt 'ã ujarênk ba. Kati, nãm me 'êx. Me ja ne me kajgo mex ne kam we ar amã mÿjja jarênho ban we amijo àmra ba. Kati, nãm arÿk ar ta amijo 'êx ne amijaxwekôt amiman kam we amijo àmra ba. Kati, nãm me 'êx. ¹⁹Ne arÿm Kritumã iren 'amÿnh kêt.

Kritubê Metÿndjwÿnh djwÿnhkumrêx. Ta ne wÿnhÿ. Kute ta krã pyrãk. Me baje Kritu mar ne gu me baje ÿ pyrãk. Nhym bep Kritu ta ne kute krã pyrãk nhym me kum iren 'amÿnh kêt. Nã gu me bakukràdjari ajkanhök ne kam tu batypydji. Apÿnh kêtê. Me bakukràdjãmê me bakudjêk kunõ aben pydjìn me bakrãmã kumê.

Nãm ã Kritu ta kubê krãkam ta ïo djuw mexo tẽ, me bajo djuw mexo tẽmo ane. Kritu ne ta ô me jamã bënjadjwÿr ne kam amim meo atom ne meo djuw mex. Te apÿnh me ba djari baba nhym tu amim me bajo atom, me bajo aben pydjì gu me batypydjin aben mē ar baban kam kôt bamã aben jabên kam baro'ã Kritu maro tẽ. Metÿndjwÿnh ne amim me bajã karõ gu me kam kãmã kôt ã maro batẽmo ane.

²⁰Arÿm ne gar Kritumê ro'ã ty nhym arÿm ar amã mÿjja kukràdjà kakritja mÿm kumê. Kritu kute ar amã mÿjjao apêx gar kam mã ajte amã akukràdjà kakrit kÿnh. Mÿkam ne gar akubyn mã amã pyka jakam me kukràdjà jabit kÿnh ne kôt ar amijo aba? Nãm we me,

²¹—Kwârÿk wãnh byr kêt,

—Kwārīk wānh kakin̄h kêt,

—Kwārīk wānh kupēnh kêt, ã we anhyr ar ba gar kôt amijo aba.

²²Djām Metīndjwýnh kukràdjà ne ja ne me we ar “Kwārīk wānh” ar o ban mekbê mýjja pyma ar o ba? Kati, me ne me ane. Kukràdjà tũm, kukràdjà kakritja arým kêt. Metīndjwýnh arým kukràdjà tũmjao apêx gu me arým kôt amijo baba kêt. Mrāmri kute me badjakur djà pyrāk. Tebê dja me batikkrekam apêx ne me banhĩ'ã apêx ne me bakrākà'ã mrã. Nãm ã kukràdjà kakrit, kukràdjà tũmja apêxo ane.

²³Me kute mebê mýjja pymaja ne me 'êx ne kabēn mex ne. Bep kati, nãm me tu ar mýjjamã amijarēho ba, mýjjao Metīndjwýnh ne ar kum amijarēho ban 'ã memã apnê nhym me kudjwa. Nãm we me 'êx ne we ar amijo pijãmo ban ar ta aminhĩ djwýnho bikēho ba. Me ta kute we amibê axwe rēnhmã prĩne amijo bikēho ba. Metīndjwýnh kute memã ja jarēnh kêt. Me ta ne me arĩk ta kute amijaxwe bĩnmã apýnh amijo ba djari amijo ba. Nãm me amititik ne kam amijo bikēnh mexo ba. Kati, ãm kajgo mexi. Nãm me te aminhĩ djwýnhja te o ane nhym ãm mã axwe. Djã nãm me amibê axwe kurê? Kati, nãm me te o anen mã axwe.

Ar kute katàt amijo bamã arkum 'ã karõ.

3 ¹Gora ar Kritumẽ ro'ã arým akubyn atĩkam, ngô kurũm ar ajapôx kute akubyn atĩn pyrāk, kam dja gar kàjkwakambit mýjja jabej ajkam ama. Kam ne Kritu nhỹ, Metīndjwýnh djubôk'ãnh nhỹ. ²Dja gar kàjkwakam mýjjakôtb̄it ajamak bēn. Kwārīk wānh pykakam mýjja mar kêt.

³Kute Kritumẽ ro'ã arým atyk pyrāk. Djām me tykkam kute pyka jakam mýjja mar got. Bir be, arým Kritumẽ ro'ã ar atyk ne ro'ã akubyn atĩkam, dja gar jakam, pyka jakam, Kritumẽ atypydjin ari ar aba. Nhym kam Kritu kadjwýnhbê, Metīndjwýnh ar ajo bipdjur mex ne, kute apytār mex kadjy. Kam dja gar kàjkwakam mýjjabit ma. ⁴Be, Kritumẽ ne gar atypydjin ar aban kam tu atĩkumrēx ne. Gêdja Kritu akubyn raxo amirĩt ne kam abêngôkredjwý^b arým araxo amirĩt.

⁵Bir be, kam dja gar arĩk abawã tu krã'yrkumrēx gê on wānh nō. Kwārīk wānh gar krô'ã aprô kêt, nhym me nijadjwý krô'ã mjēn kêt. Ar aprô prãm, nhym me ni mjēn prãmja kwārīk wānh nō. Gê me my prô prãm ne kurē ar ba, nhym me ni ar mjēn prãm ne kurē ba kwārīk wānh nō. Me kum mýjja punubit prãmja kwārīk wānh nō. Ne me kum nêkrēxb̄it prãmja kwārīk wānh nō. Nãm me kum nêkrēxb̄it kĩnh ne kam kôtb̄it amak bēn ne kam kum Metīndjwýnhja mar prãm kêtumrēx. Me kute mýjjao Metīndjwýnh karõ nhipêx ne kute we kum ar amijarēho baja tãm ne Metīndjwýnh kum kĩnh kêtumrēx. Nhym me kum nêkrēxb̄it prãmjadjwý kum kĩnh kêtumrēx. Amẽ punu nhym kam kum kĩnh kêtõ aben pyrāk ne. Kam ne ba ar amã,

^b3.4 Apýnh me ô pyka djari kunĩkôt ne me kunĩ bêngôkre. Kubekã jakamẽ me kakrãtykmẽ me babêngôkremẽ ne me kunĩ: bêngôkre.

—Tām gêdja on wānh nō, ane.

⁶Mỳjja ja kunĩkôt ne Metĩndjwỳnh mekam ngry:k ne. Godja me kute mỳjja jao ban kam kute Metĩndjwỳnhkôt amijo ba kêtikumrêxja, me tām gêdja Metĩndjwỳnh mekam ngryk ne ĩ memā o pānh. ⁷Nhym bep amrêbê ne gar gadjwỳ ā amijo aba punuo anen ajbit ma.

⁸Bep jakam dja gar on mỳjja ja kunĩ kanga. Kwārĩk wānh gar angryk kêt ne memā adjàkjêr kêt ne aje amipānhmā mar kêt ne me kāmex jarēnh kêt ne ajajkwakam akabēn punu 'ō jarēnh kêt. Me my kute me nire kukràdjā'ā me aprỳja dja kêt. Nhym me niredjwỳ kute me my kukràdjā'ā me aprỳjadjwỳ dja kêtikumrêx.

⁹⁻¹⁰Kwārĩk wānh gar akukràdjā tũm jakôt abenmā ajêxnhĩ kêt. Arỳm ne gar akukràdjā tũmja mũm kunĩ mē. Ar aje akukràdjā tũmkôt aje abenmā ajêx aba ja ne gar arỳm nhĩ'ām kunĩ mē. Pānh ne gar akukràdjā nykôt mỳjja mexbit ma. Metĩndjwỳnh kute ar ajo ny nhipêx djwỳnh ne ar ajo nyo tē, ar aje Metĩndjwỳnh mex pyrāk kadjy ne ar ajo nyo tē, prĩne ar aje Metĩndjwỳnh markumrêxmā ne ar ajo nyo tē.

¹¹Metĩndjwỳnh kute meo nykam ne me arỳm abenmā kre rax kêt ne tu arỳm abenā tỳm ne typydji. Arỳm Kritukôt me apỳnh ba djāri kute abeno kurê djwỳnh kêtê ne kam arỳm tu abeno kamyn abeno ôbikwa. Me bajtemmē mebê idjaermē, me tām ne Metĩndjwỳnh arỳm meo aben pydji. Ne ajte me my nhinhu kà rēnhmē me mykà tāmē, me tām ne Metĩndjwỳnh ajte meo aben pydji. Me kute arỳm me krôrmē me krôr kêt apỳnh ô pykakam ba djāri bajamē, me tām ne Metĩndjwỳnh arỳm meo aben pydji. Me kute me pa 'amỳnh nhym me memā àpēnh kajgo ar bajamē me kute memā o pānh kadjy àpēnhjamē, me tām ne arỳm Metĩndjwỳnh meo aben pydji. Nā, ne arỳm memā me kute abeno kurê djwỳnhja arỳm o ajngrā. Kritukôt ne me aben pydji ne kam kute Kritubit mar, arỳm ajbit kute amikajmātā mar. Djā nām kum me'ō kĩnh kêt ne? Kati, nām kum me kunĩ kĩnh ne me 'āno dja. Nām me 'āno āmo aben pyrāk ne.

¹²Ga Metĩndjwỳnh kute amijo ar apytār ne arỳm kute amim ar ajo bikjêr ne kam kute ar ajo mex ne kum ar ajabêikumrêxja pumũ. Kam gêdja gar tu amim akukràdjā ny man kôt amijo aba. Gora ar amā me kaprĩ ne adjukaprĩ ne ar meo aba. Kwārĩk wānh ar ajō apydji arax prāme ari aba kêt. Dja gar memā aprĩ mex ne ar meo aba. Tu akabôt katin akrānmā ar meo aba. Be, mỳjja mex ja dja gar ā maro anen kam tu kôt amijo aba.

¹³Gêdja me'ō ari kute anoknoro ba jabej kwārĩk wānh ga kum adjàkrê kêt ne mā kum akabēn mex jarē. Dja gar ā anen ar abeno aba. Dja gar abenkam amikrà rax jabej nār kon amikrà ngri jabej tu o aknon abenkam angryk kêt. Gar Bēnjadjwỳr djwỳnh arỳm ar aje kam amikràja tu o biknorkumrêx ne ar akam ngryk kêtja pumũ. Dja gar ā anen ar aje abenkam amikràja tu o abiknorkumrêx ne abenkam angryk kêt.

¹⁴Gora ar mỳjja ja kunĩkôt amijo aban kam ajte iby amā aben jabê. Gora ikabēn ja ma. Ar amā aben jabēn ar abeno aba. Ar atypydji djā ne ja. Ar amā aben jabēn kam atypydjin kam amexkumrêx. ¹⁵Djām ar aje abeno ajtemmā ne Metĩndjwỳnh

amiwÿr ar ajuw? Kati, gar atypydjin aben kam adjumar mex kadjy ne amiwÿr ar ajuw. Bir be, kam dja gar adjumar mexbit ma. Kritu ta umar mextire jao dja ar amã umar mextire jadjã ne o aben nêje me akukrà. Dja ta ò me umar mex djão prĩne ar ajaên kam o aben nêje ar ajakre. Ê, gora ar Metĩndjwÿnhmã amikĩnh jarẽ.

¹⁶Gora ar prĩne ajamakkrekam Kritu kabên kunĩ nhôn kôt ar amijo aba. Ne akabên mexo abenmã Metĩndjwÿnh kukràdjã jarên o abenmã tĩn jadjã. Ne Metĩndjwÿnh'a angrer aba. Mebê idjaer nhô me ngrer tũm jarên kam ajte Metĩndjwÿnh Karô kute ar amã me ngrer ny jarênhjadwÿ jarẽ. Ne Metĩndjwÿnhmã ar amikĩnh jarẽ, angrerkôt kum akadjwÿnhbê akĩnh jarẽ.

¹⁷Dja gar Bẽnjadwÿr Jejukôt amijo aban Jeju Bãmbê Metĩndjwÿnhmã amikĩnh jarẽ. Djãm ar akàtãm, djãm ar anhô bẽnjadwÿr kêt dja gar adjàpênh punun akabên punu? Kati, ar abê Bẽnjadwÿr Jeju nhô àpênhkam dja gar adjàpênh mexkumrêx ne akabên mex ne. Ar abê Bẽnjadwÿr Jeju nhô àpênhkam dja gar anhô bẽnjadwÿrkôt amiman kôt akabên mexkumrêx ne kôt adjàpênh mexkumrêx ne mÿjja kunikôt Jeju Bãmbê Metĩndjwÿnhmã amikĩnh jarẽ. Kritukôt kum amikĩnh jarẽ.

¹⁸Ê, ar apa, ar anire, arÿm ar amjênja dja gar amjên kabên man kôt amijo aba. Bẽnjadwÿr djwÿnh kute ar amã ã anhÿrkam dja gar ã amjên kabên mar ne kôt amijo abao ane nhym kam mexkumrêx ne.

¹⁹Ê, ar apa, ar amy, ar amã aprô jabên kum akabên djã jarênh kêt ne kum akabên mexbit jarẽ.

²⁰Ar apa, ar aprĩre, gora ar ar anãmẽ ar abãm ar kabên man ar kabênkôt amijo aba. Ar kute ar amã kabên jarênhjakôt amijo aba ne o abiknor kêt. Nhym kam Bẽnjadwÿr djwÿnh ar akam kĩnhkumrêx ne.

²¹Ê, ar apa, ar ajabatànha, kwārĩk wãnh gar akra arkum akabên kêt ne arkum ngryk jadjãr kêt. Arkum akabên mexbit jarẽ. Dja gar arkum adjàkrê nhym ar arÿm kaprĩ ne katàt mrãnhja kanga.

²²Ê, ar apa, memã ar adjàpênh kajgo ar abawã, me kute ar ajo pãnh ne amim ar apa 'amÿnh gar memã adjàpênh kajgo ar abawã gora ar pyka jakam ar apa 'amÿnh djwÿnhja kabên ma. Kute mÿjja ar amã arênh kunikôt dja gar kabên man kôt amijo aba. Djãm me kute ar apumũho ku'èkambit got gar memã adjàpênh mex ne, nhym we me ar akam kĩnhmã? Kati, me kàxãdjwÿ dja gar tu adjàpênh katàt ne. Ar amã Bẽnjadwÿr Jeju kĩnh ne amã umakam dja gar tu kum adjàpênh katàt ne.

²³Gora tu ar adjàpênhkumrêx. Kwārĩk wãnh gar adjàpênh punu kêt. Dja gar tu adjàpênh kunĩ amã kĩnh ne kupênho tẽ. Ne tu adjàpênh mexkumrêx ne katàt adjàpênh tẽ. Djãm pykabê mebêngôkre 'ôbitmã ne gar apê? Kati, kàjkwa kam ar anhô Bẽnjadwÿrmã ne gar apê. Kam ne ba ar amã katàt ar adjàpênh'a karô, ar aje katàt adjàpênhwão atẽmmã ne ba ar amã adjàpênh'a karô.

²⁴Gora ar ama. Bẽnjadwÿr djwÿnh ta dja ar amã o pãnh. Kute ò me jamã mÿjja mextire djirja dja ar amã kungã gar amim aby. Bir be, Bẽnjadwÿr Kritumã ar adjàpênhja man kam kôt kute ar apa 'amÿnh djwÿnhmã adjàpênh ar aba.

²⁵Bep apŷnh me axwe djàri gêdja Metĩndjwŷnh memã axwe pãnh jarẽho tẽ. Amrêbê tĩnri axweri gêdja Metĩndjwŷnh kôt kum o pãnh ne, tĩnri axwekam dja memã o pãnh aben pyrãk ne. Djã nãm we,

—Ije bep tãmja ne ôbikwa krãptĩ ne kam bẽnjadjwŷr rax. Kwãrik wãnh kum pãnh jarẽnh kêt. Ba 'uwtĩjamã pãnh jarẽ, anhŷr got? Kati, nãm tu memã pãnh jarẽho aben pyrãk ne. Ne me axwekam katàt memã o pãnh.

Me bẽnjadjwŷr kute ô àpẽnho ba katàtmã.

4 ¹Ë, ar apa, ar aje meo pãnh ne amim me pa 'amŷnh nhym me ar amã àpẽn kajo ar bawã, ar amã ne ba ikabẽn. Gora ar anhõ àpẽnhmã akabẽn mex jarẽn meo aba katàt. Ë, ar gadjwŷ ne gar kàjkwakam anhõ Bẽnjadjwŷr. Gora ar ama. Tãm ne ja.

²Ë, ar apa, gora ar akupãnhntã Metĩndjwŷnhmã akabẽn 'ãno dja. Gora ar Metĩndjwŷnhmã amijarẽnhkam amã adjukanga kêt ne aje kum amijarẽnh ar o abakôt aje mŷjja'ã 'wŷrja tãm dja gar kam ama. Ne kum ar akabẽnkôt kum amikĩnhdjwŷ jarẽnh 'ãno dja.

³Kum ar akabẽnkôt ar badjwŷ kum ar ijo a'wŷ gê Metĩndjwŷnh mŷjja kute ar ibê àptàrjao ajngrã bar tu memã Metĩndjwŷnh kabẽn jarẽ, memã Kritu jarẽ. Nãm mekbê apdju bar kam ije memã o amirĩtmã. Kam ne ba mekbê ijê djakam idjãmja. Nã bãm ije memã Kritu jarẽho itẽm katikôt nhym me mekbê ijê djakam imẽ. ⁴Bir be, kam gêdja gar kum ijo a'wŷ, ije memã arẽnh ne ije katàt memã o amirĩtmã. Ije Jeju mekbê bipdjurja memã arẽnh ne ije memã mã o amirĩt nhym me kute katàt marmã. Nã, kadjy ne Metĩndjwŷnh amim idja, ije prĩne memã o amirĩtmã. Tãm ne ja.

⁵Be, me kàtãm kadjy, me kute Jeju mar kêtja, kadjy dja gar akrànãm amijo aba mextire ne memã akabẽn mexbit jarẽ. Gêdja aje Jeju'ã adjujarẽnh djà awŷr bôx ga kam mekmã Jeju jarẽ.

⁶Gora akrànãm memã adjujarẽnh akrĩ gê me ar amã,

—E kum goja ajte adjujarẽnh nhŷ. Ga nã gãm akabẽn mar prãmre, ane. Gêdja me kute mŷjja 'ô mar prãm jabej akukij ga kam memã katàt 'ã adjujarẽnh nhŷ. Be, tãm ne ja.

Apŷnh ôbikwamã kute kabẽn janor.

⁷Ota me bakamy Xikiku dja ar amã prĩne ijarẽ. Gwaj bamã Xikiku jabêkumrẽx tãm dja ar amã ijarẽ. Nã, nãm ikôt àpẽn mexkumrẽx ne àpẽn kanga kêtumrẽx. Bẽnjadjwŷr nhõ àpẽnkhumrẽx ne ja. Nãm ar ikôt kum àpẽn ar ba. Ta dja prĩne ar amã ijarẽ. ⁸Kadjy dja ba ar awŷr ano, kute ar amã ar ijarẽnh gar aje ar imar nhym kute ar amã kĩnh jadjàr gar ajte atŷx ne akĩnhmã. Kadjy dja ba ar awŷr ano. ⁹Gwaj bakamy Ônemudjwŷ dja ba ano, wãm ar ro'ã ar ano. Gwaj bamã Ônemu jabêkumrẽx, tãm dja ba ano. Nãm amim Kritu markumrẽx ne kanga kêt. Ar ajõ 'ô. Be, ar ta dja ar ar amã jakam mŷjja kunĩ jarẽ.

¹⁰Gwaj bakamy Arxakumẽ ar iro'ã mekbê ijê djâkam dja. Ne ar ajo aman wãm ar amã amijarẽ. Nhym Makudjwỳ kubê Banabe tãmdjwỳja adjwỳnhdjwỳ ar ajo aman wãm ar amã amijarẽ. Ë, arỳm ne ba ar amã 'ã karõ. Dja ar awỳr tẽn bõx gar amiwỳr o wadjàn kum akabẽn mex jarẽ. ¹¹Jejuw, mete kum Juxu jarẽnhja adjwỳnhdjwỳ ar ajo aman wãm ar amã amijarẽ. Be, Arxakumẽ Makumẽ Jejuw ar ajbit ne Ar kubê idjaer ne kute amim Jeju mar ne ar ikõt àpẽnħ ar ba. Ar kute mekmã Jeju jarẽnh nhym me kute amikajmãtã Jeju mar nhym Metĩndjwỳnh kute ar meo bamã ne ar ikõt àpẽnħ ba. Nãm ar ikõt àpẽnħ mexkumrẽxo ikĩnh ne.

¹²Eapraj, ar ajõ 'õ ne kubê Kritu Jeju nhõ àpẽnħ ne ar ajo aman wãm ar amã amijarẽ. Nãm Metĩndjwỳnhmã ar ajo à'wỳr 'ãno dja. Tyk djã kêt ne ar ajo à'wỳro ban kum,

—Ga dja ga aro tỳx gẽ ar ajã ngrà tỳx ne akanga kêt ne amar mex nhinomã kurẽ. Ga dja ga arkum 'ã karõ gẽ ar kõt mrã, aje amim ar'ã karõkõt mrã. Nãm ã kum ar ajo à'wỳro ane. ¹³Be, ba ne ba inoo Eapraj pumũn kõt ar amã 'ã pi'õk no'õk ne. Mrãmri ne ar ajã àpnhĩx ne. Krĩraxbê Raodjikam ar jamẽ krĩraxbê Ijeporikam ar jamẽ me akunĩ'ã ne àpnhĩx ne. Ba ne ba arỳm omũn ar amã 'ã pi'õk no'õk ne.

¹⁴Rukabê me kane djwỳnh gwaj bamã kĩnhkumrẽxjamẽ Temanhmẽ ar ar ajo aman wãm ar amã amijarẽ.

¹⁵Nã bãm Raodjikam gwaj baje abeno bakamyo ama ne. Gora arkum ijarẽ. Nĩpa nhũrkwākam ar kute Jejukõt aben pydjiwãmẽ Nĩpa bẽngõkremẽ ne ba o ama ne. Ar wãmãdjwỳ ijarẽ.

¹⁶Ë, ije ar amã pi'õk no'õk nhõrwã gar omũ:n omũnh pan kam amũ krĩraxbê Raodjikam ar kute Jejukõt aben pydjiwãmã angã gẽ kam ar amipãnh ar amã wã ngã. Dja ba ije wãm ar amã pi'õk no'õk nhõrwã gar ga wã pumũn amũ ar wãmã angã gẽ Raodjikam ar wã amrẽ amipãnh ar amã wã ngã. Gar aprakamã omũ.

¹⁷Ë, Akipumã kum,

—Gora Bẽnjadjwỳr kute amã adjàpẽnħ jarẽnhja on o tẽn inomã amẽ, ane.

¹⁸Ba ibê Paur ne ba wãm ar amã ikabẽn ne. Nhym bep ngrire ja ne ba ba inhikrao ipẽx ne. Nã bãm ar ajo aman kam wãm ar amã amijarẽ. Gora mekbê ijê djâkam idjãmja man o abiknor kêt. Gẽ Metĩndjwỳnh ukaprĩkõt ar ajo djuw mex. Tãm ne ja.